



М.Әуезов атындағы
Оңтүстік Қазақстан университеті

Зерттеу университеті деген мәртебе алды

Шымкенттегі М.Әуезов атындағы Оңтүстік Қазақстан университеті 80 жылдық мерейтойын атап өтті. Бұл оқу орны үшін биылғы айтулы оқиғалардың бірі де бірегейі. Салтанатты іс-шара барысында жетістіктер де, алдағы жоспарлар да айтылды. Яғни кең көлемде есеп берілді, жылы лебіздер білдірілді.

Ғылым және жоғары білім министрі С.Нұрбек Президент Қасым-Жомарт Тоқаевтың құттықтау хатын оқып берді. «Осы кезеңде Әуезов университеті тарихы терең, дамуы мол іргелі оқу ордасының біріне айналды. Оқу орнының ұжымы білікті кадрлар даярлау ісіне, ғылымды дамытуға елеулі үлес қосып келеді. Университеттің халықаралық және ұлттық рейтингтегі жоғары көрсеткіштері соның айқын дәлелі. Бүгінде оқу орнының жобаларды жүзеге асырып, аймақтың қоғамдық-саяси, әлеуметтік және экономикалық дамуына атсалысуда», делінген Президент құттықтауында. Сондай-ақ министр 2023 жылдың 15 қарашасында Үкімет қаулысымен оқу орнына зерттеу университеті деген мәртебе берілгенін мәлім етті. Университетті дамытудың 2023-2027 жылдарға арналған бағдарламасы қабылданған. Зерттеу университеті мәртебесі ғылым арқылы елдің индустриалды-инновациялық, әлеуметтік-экономикалық дамуын қамтамасыз етуге, жоғары білікті кадрлар даярлауға мүмкіндік береді. Сонымен бірге 5 жылдық бағдарлама аясында жаңа зертханалар пайда болады, қосымша қаржыландыру артады, білікті кадрлар жұмысқа тартылады, зерттеу университеті болған соң профессорлық-оқытушылар құрамының коэффициенті жоғарылайды. Бөлінген қаржылар ғылыми зерттеу орталықтарын жаңартып, жабдықтауға жұмсалады.

Жоғары оқу орнының жаңа бастамаларды жүзеге асырып, жоғары жетістікке жетуінде сіңірген еңбегі мол, іскер де ізденімпаз басшы, М.Әуезов атындағы ОҚУ ректоры Д.Қожамжарованың мәлімдеуінше, білім ордасы 30 мыңға жуық студентті қамтыған. 3 жоғарғы білім жүйесін топтастырған көпсалалы университет атанып отыр. Жаңа мәртебе ғылым мен өндірісті, экономиканы бір-бірімен ұштастыруға мүмкіндік туғызады. Университеттің еліміздің ғылымына қосқан үлесі қаржылай есептегенде 5 млрд теңгені құрады. Оның ішінде коммерциялық бағыттағы, жас ғалымдардың, халықаралық мәндегі жобалардың жалпы саны 300-ден асады. Сонымен бірге мегаполистің дамуы, су, жерасты сулары, күн энергиясы тақырыбында біраз зерттеулерді қосуға болады. Ректордың айтуынша, жаңа мәртебе енді еліміздің ғылым саласына жас ғалымдарды, білікті мамандарды лек-легімен шығаруға үлкен мүмкіндік сыйлайды. Әсіресе жасанды интеллект ғылымын меңгерген мамандар шоғыры қалыптасады. Сондай-ақ оқу орны шетелдікті қосқанда 38 университетпен тығыз қарым-қатынас орнатқан. Бүгінгі таңда Әуезов университетінде 1,5 мың оқытушы құрамы болса, оның 300-ден астамы ғылым кандидаттары.

М.Әуезов атындағы ОҚУ еліміздің оңтүстік-өңіріндегі ең іргелі оқу орны болғандықтан оған қосымша ұлттық университет мәртебесін беретін уақыт келді. Өйткені университеттің тарихы терең, екіншіден ғылым саласына қосқан үлесі мол, үшіншіден алдағы уақытта ғылымды өрге сүйрейтін әлеуеті де жетеді.